



**Trump aser Putin den külemi
ajuruteptsü mulunga lir: Zelenskyy**

**Yamal-i Barcelona den küm 6 atema
tenangzüktepba yanglushiogo**

VOL. XXII ISSUE NO. 224 (ADOK 224)

DIMAPUR

YANGTEPNÜ (THURSDAY)

MONUPII (MAY) 29, 2025

₹ 5.00

Reservation policy anema tanü lungkak aiter

Dimapur, May 28, 2025 (TYO): Sorkar nungi telangzüba manguba agi 5 Tribes Committee on Review of Reservation Policy-i May 29 nungi lungkak aittsü metetdaksüogo.

State sorkari Committee dang lungkak aittsü sentong thinentüsü mepishiogo. May 7 nü iba onük atema luden ka tentetogo aser parnoki ita asem tsüngda Policy for Reservation asadanga repranger osang ka agütsütsü ta sorkari ashi.

Ajisüaka, 5 Tribes committee-i kin 5 nungi tongti teloktem den külem senden ka amendang state sorkari nendaka meinyakba dang masü saka tongti tebilemtsütem atema meinyaker anungji lungkak aittsü telemtetba agi.

Tanü Kohima, Dimapur, Mokokchung, Zunheboto, Wokha, Niuland aser

Chümoukedima district headquarters ajak nung Nagaland Job Reservation Policy repringshitsü atema state government nem takhangba agüja lokti senden alitsü.

Ao Senden-ia Aor senso ajak dang asüng Mokokchung nung lungkak aitba sentong nung shilem agitsü mepishia metetdaksüogo.

May 29 anepdang 10:00 ako Main Police Point Mokokchung nungi sentong tenzütsü aser Deputy Commissioner office tonga aotsü. Idakji Deputy Commissioner nem Nagaland sorkar dangi züluba shi ka agütsür sentong tembangtsü ta Ao Senden-i yashi sangdong ka nung shiogo.

Iba sentong nung senso ajak adentsü mepishir ta Ao Senden mendenpurtemi ayongzükogo.

Protected Area Permit (PAP) atema metetdaksür

Dimapur, May 28, 2025 (TYO): Bendangertem Nagaland-i marudang tamasa Protected Area Permit (PAP) agizükdakjang ta Commissioner of Police cum Foreigners Registration Officer Dimapur-i metetdaksüogo.

Iba ya talisa sorkar Departments aser kinungertem/ tangartem dang nenshia metetdaksü.

Ministry of Home Affairs-i Nagaland nung Foreigners (Protected Areas) Order, 1958 kübok Protected Area regime yak mapang tatsüka atema agiena liasü saka arrtsülen security tensa dak rangloker tanaben tenzüksühiogo.

Foreigners (Protected Areas) Order, 1958 kübok Protected Area regime nung lateta aliba ama Nagaland state ajunga iba ozüng kübok adener. Nagaland

semdangi arutsü bendanger ajaki bangdakpur dang nungi Protected Area Permit (PAP) meshitsüla ta Commissioner of Police-isa ashi.

Afghanistan, China aser Pakistan nungi sensotem aser bendangertemi Nagaland semdangi marudang Ministry of Home Affairs dang nungi jelia temelaba meshitsüla.

Bandangertem Nagaland tonga aruba sülen ghonda 24 tsüngda state/district nung Foreigners Registration Officer (FRO) nung tenüng zülüoktsüla.

Chümoukedima, Dimapur aser Niuland district temi aruba bendangertemi e-mail fro-nadpr(@.nic.in mesüra mobile number 7085065056 ajanga Commissioner of Police cum FRO Office, Dimapur office den tongteptsü akok.

Assam arrtsülen alir nem arms licences agütsütsü

Guwahati, May 28, 2025 (Agencies): Assam Cabinet-i meta talang pilar alidak aser lendong atalokba tesemtem nung security akangshitsü atema sensotem nem arms licences agütsütsü telemtetba agiogo.

"Assam ya lendong ataloktsü ana nung aliba state ka lir. Meta talang, lendong atalokdak aser arrtsülen pilar alirtem nem arms licences agütsütsü onoki lemtetogo" ta Chief Minister Himanta Biswa Sarma-i ashi.

"Onoki lisopurtem aser indigenous Indian citizens dang Arms Act kübok arms licences atema application agütsütsü ayongzüktsü" ta pai ashi.

Lisopurtemi ozüng alema

inyaksangshir dang nungi kümzüka ayutsü aser iba ya talisa ozüng amertem peria malidak alirtem tashi itdaksütsü sentong nung iba ya densemer, ta Sarma-isa ashi. "Iba inyakym ya state nütsüng yongsük nem prangpong agütsütsü atema masü saka lisopurtemi lendong nungi jenbua alitsü atema temulung uludaksütsü atema lir. Iba maparen ya arms laws kübok akangakanga inyaktsü aser prescribed eligibility criteria ajanga applications asadanga repringtsü" ta paisa metetdaksü.

Iba lemtet ajanga Assam internal security framework nung temelenshi ka bener arur aser arrtsülen alirtem kümzüka ayutsü.

Nagaland aser Korea tsüngda tesentaktep yanglur

Dimapur, May 28, 2025 (TYO): May 28, 2025 nü Nagaland sorkar aser Republic of Korea tsüngda kanga dang tongtipang senden ka menogo.

Iba senden nung Nagaland tenüng nung Industries & Commerce Advisor Hekani Jakhalu, Industries & Commerce Director P. Tokugha Sema nati anir ketdangsürtem aden.

Directorate of Industries & Commerce nung ayonga amenba senden nung Deputy Chief of Mission Sang Woo Lim-i anir Republic of Korea teshimtet telok aden.

Tarutsü nung Nagaland aser Korea tsüngda trade, investment, technology exchange aser capacity building nung amalitepa inyaksangshia aotsü lenmangtem bushiteptsü atema senden amen.

Senden nung agro-processing, handicrafts, textiles, human resources development, logistics aser sustainable industries wadang nung

temulung agüja jembi kechiyong Nagaland nung item wadang inyaktsü sadema lir aser Korea-i advanced technology aser market linkages agütsütettsü.

Senden nungsa Nagaland nung Korean language education tuluba inyaka aotsü indang jembiogo.

Industries & Commerce Director P. Tokugha-i Korea teshimtet telok pelashishia agizük aser Nagaland nung rongsenketzüng renloka aotsü aser lanurtem asoshi mapa adoktsü atema tesentaktep tajung yanglutsü indang jembi.

Advisor Hekani Jakhalu-ia state sorkari investment aser tesentaktep yangluba nung temulung agütsüba indang nenshia ashi.

"Nagaland nung agro-processing, handloom & handicrafts, organic farming, health sector aser tourism wadangtem inyaka aotsü lenmang sadema lir. Local aser

international partners atsür arutsü aser lanurtem asoshi mapa den skill-building nung yariteptsü atema lenmangtem bushiteper" ta lai ashi.

Sang Woo Lim-ia parnok pelashishia agizükba aser kanga junga anepaluba atema tenüngsang agütsü.

"Nagaland sorkar den amalitepa aotsüba atema kanga pelar. India nung invest asütsü süra ni Nagaland shimtsü" ta Lim-isa ashi.

Korea-i Northeast India aser talisa Nagaland den tesentaktep ayutsü tejangraba tulu lir aser iba yagi telok anaprong ajangzüktsü, ta paisa metetdaksü.

Korea nung innovation, small and medium enterprise (SME) development aser human Resource Development kanga junga inyaker aser item tashi ajanga Nagaland nung entrepreneur maparen akangshitettsü, ta Lim-isa ashi.

Manipur MLA 44-i sorkar akümtsü renema lir

Imphal, May 28, 2025 (Agencies): Manipur nung MLA 44-i sorkar tasen ka akümtsü renemogo ta BJP MLA Thokchom Radheshyam Singh-i ashi.

May 28, 2025 nü Radheshyam den külemi MLA 9-i Raj Bhavan nung Governor Ajay Kumar Bhalla den ajurutepa sülen iba osang metetdaksü.

"Nübertemi aginüba ama MLA 44-i sorkar akümtsü renema lir. Onoki iba osang Governor nem sangoktsüogo. Onoki onük angatetteptsü atema teinyaktsütem lemsatepogo" ta pai ashi.

"Governor-i onük ajak angaogo aser nübertem taginüba ama inyaktsü shiogo" ta Radheshyam-i ashi.

Parnoki kodang sorkar tasen akümtsü ta osangbeneri asüngdangdang "BJP central leadership-i lemtet agitsü" ta pai langzü.

"Ajisüaka, onoki renema lir ta ashibaji sorkar tasen ka akümtsü asüngdangba den kasa lir. Speaker Th Satyabrata-i

MLA 44 den kija aser külemi ajurutepogo. Sorkar tasen akümtsüba nung shingaia memulungba mali" ta BJP MLA Radheshyam-isa ashi.

"Nübertem kanga timtemer. Taoba sorkar kümsük nung COVID ajanga küm ana akoksar anem. Tan kümsük nung mangatettep ken o ajanga küm ana akoksaogo" ta paisa ashi.

Tanü Governor den ajurutepertem rongnung BJP MLA 7, National People's Party (NPP) MLA 2 aser Independent 1 liasü

BJP lennir N Biren Singh-i chief minister menden toktsüba sülen taküm February ita nungi Manipur nung President's Rule benoka lir.

May 2023 nung Meitei aser Kuki-Zo nunger tsüngda mangatetteptsü adoka raraba atema Biren'er sorkar mekokteter ta aitsüba sülen pai chief minister menden nungi sodi agi.

Züngsem 60 agi akümbe assembly nung tang MLA 59 lir kechiyong MLA ka asüba ajanga

menden ka tazüng lir.

BJP-i aniba teloktep sorkar nung Meitei MLA 32, Manipuri Muslim MLA 3 aser Naga MLA 9 lir. Parnok ajak senteper MLA 44 lir.

Manipur nungsa Congress MLA 5 lir aser parnok ajak Meitei nunger dang. Tanüngba MLA 10 ji Kuki nunger dang lir aser parnok 7 BJP ticket nungi, 2 Kuki Peoples' Alliance nungi aser ka Independent lir.

Meitei nunger teimba ser aliba Imphal Valley nung lungkak aitba mapang ka sorkar tasen ka akümtsü indang jembir.

Sepaitemi state sorkar bus gari ka nungi Manipur ojang agientsü tetuyuba agütsüba sülen Meitei nungeri lungkak aittsü tenzüka liasü.

Iba ya May 20 nü Gwaltabi nung atalok aser Meitei nungeri iba tatalokba atema Governor dang yimjak nung tatok meshitsü akhanger.

Parnokisa Chief Secretary, DGP, aser Security Advisor nunger mapa nungi anentsü takhangba agütsür.

CTAN-NNQF-i Jun 7 nü Public Dialogue ka ayonger

Dimapur, May 28, 2025 (TYO): Combined Technical Association of Nagaland (CTAN) aser Nagaland NET Qualified Forum (NNQF) ajanga Public Dialogue ka alitsü metetdaksüogo.

Nagaland nung Assistant Professors aser Librarians 147 onük atema iba sentong agitsü ta parnoki ashi.

Sentongji June 7, 2025

anepdang 11:00 ako nung Angami Women Organisation Hall nung alitsü.

CTAN aser NNQF-i sorkar nem anogo züngzüktsüba süiadokaka ola madokba atema iba sentong ayonga agitsü.

Iba sentong nung requisition delays, open competition, fair recruitment, aser Common Educational Services

Examination nung ashishitep melii inyaksangshia aotsü onüktem benoka lemsateptsü ta CTAN aser NNQF-i metetdaksüogo.

Iba sentong nung tebilemtsü khuret abenba sensotem, sendaktepa alirtem aser bangdakpurtem adentsü jaoker ta CTAN aser NNQF-isa metetdaksü.

Chief Secretary-i Nagaland Solar Mission asadang



CS Conference Hall, Nagaland Civil Secretariat nung May 28, 2025 nü Nagaland Chief Secretary, Dr. J Alam, IAS ajanga Nagaland Solar Mission den senden ka ayongzüka amendang tangokba noksa nung angur.

Dimapur, Monupii/May 28 (TYO): Nagaland Chief Secretary, Dr. J Alam, IAS ajanga Nagaland Solar Mission den senden ka CS Conference Hall, Nagaland Civil Secretariat nung May 28, 2025 nü mena liasü.

PM Surya Ghar: Muft Bijli Yoiana (PMSG: MBY) Rooftop Solar (RTS) den lirumedema inyakba Nagaland Solar Mission inyakyim asadanga jembitsü asoshi Chief Secretary ajanga iba senden ya ayongzüka liasü.

Iba senden nungya Secretary, Power, Asangla Imti, IAS; Addl CE (D&R), Team Leader, Nagaland Solar Mission Er. Lobosang aser Power Department nungi

ketdangsürtem dena liasü.

Nübur timbai iba scheme agitettsü asoshi osang prokshiba aser awareness campaign kanga junga agütsütsü nungdaker, ta Dr. Alam-i ashi.

Pai department dang portal ya nisung atsür arutsüsa, amshitetsüsa yanglutsü aser nisung timbai angateta register asütsü atema oshi tongmelang amshitsü totuyuba agüja liasü. State sorkar teyari nung Nagaland Solar Mission ya state tesem ajunga nung takok ngua mapa kuma inyaksü imlar, ta pai ashi.

Iba senden nung Team Leader, Nagaland Solar Mission, Er. Lobosang ajanga iba mission indang osang agütsü

aser rooftop solar inokba mapang customer nem smart meter ya angati agütsütsü ta metetdaksü.

Smart pre-paid meters ya Net-Meter kumdaksütetstü aser ibai Department ajanga RDSS scheme kübok agütsütsü aser tariff sangdong nung aliba ama ita shia standard meter rent kisung meshitsü, ta pai ashi. PM Surya Ghar Muft Bijili Yojana den lirumedema Solar Mission nükjidong ya state tesem ajungalen nisung aliba kidang rooftop solar panel inokdaksütsü nükjidong lir.

Consumer temi online ajanga register sütetstü aser nungdakba osang ajak par portal www.pmsuryaghar.gov.in nung angutsü.

District Youth Congress Mokokchung-i jangjatsür

Dimapur, Monupii/May 28 (TYO): NDPP Mokokchung Region indang social media nung May 26, 2025 nü post meshidak ka lemsatepba jangjashitsür, ta District Youth Congress, Mokokchung ajanga sangdong ka nung ashi.

Iba post nungya noksa ka densema lir aser tiazü nung taoba DYU tir aser mendenpurtem Temsu Jamir-i anir District Youth Congress dissolve sür NDPP nung denogo ta shia lir.

Iba sangdong ya khenyongi tiazü aser

meshidak ta metetdaksür. Ibai asaa osang tiazü prokshia nungtugu akumtsü merangba amai lir, ta District Youth Congress Mokokchung president (Incharge) Imtisunep Ozukum aser tongti zülur (Admn) Sayangpong Jamir nati sangdong ajanga ashi.

Temsu Jamir yagi District Youth Congress Mokokchung office nung senotsü amshiyim nung ochi mashiba aser meshidak amshiba ngutet.

Iba yongji District Youth Congress Mokokchung In-

Charge Sanglipong S. Pongen NPYC - General Secretary (Organization) shisa agia aser house-i mulunga Temsu Jamir ya mapa nungi anentsü aser iba sülen District Youth Congress Mokokchung nungi anen, ta sangdong ajanga ashi.

District Youth Congress Mokokchung shidak lir. Grassroots nung mangdang tajung aliba lanur lenirtem lenisüba kübok ochi nung maneni nübur tenzüksü temulungtetba nung lir, ta DYU Mokokchung sangdong ajanga ashi.

DC Chümoukedima ajanga Ruzaphema nung ali kibur dang metetdaksür

Dimapur, Monupii/May 28 (TYO): Deputy Commissioner, Chümoukedima, Polan John ajanga sangdong ka nung, Chümoukedima District nung Medzhiphema Sub-Division künok Nagaki Incubation City amenoktsü asoshi ali agitsü asar aliba kiburtem dang Ruzaphema Village atema land compensation ya May 30 & 31,

2025 anogotem office mapang Deputy Commissioner, Chümoukedima office nungi agütsütsü, ta metetdaksüogo.

Iba yimtsüng nungi alir kibur shirnoki tang tashi nungdakba documents magütsü ali, parnoki land compensation agütsüba mapang tsinglanglen agüja aliba documents agütsütsü

metetdaksüogo:

Passport sized photo - 4 nos
Bank Account details - 1
Photocopy of front page of Bank Passbook.

Identity Proof - AADHAR /DL/ EPIC, etc

Landownership papers duly certified by concerned Village Council.



Tseminyu indang Deputy Commissioner, Rohit Singh, IAS aser EAC Ruokuosetuo Tetso, NCS den tepila sentong ka May 27, 2025 nü Deputy Commissioner, Tseminyu indang Conference Hall nung agidang tasenba DC Tseminyu, Japhet Woch-i o jembidang tangokba noksa ka yangi angur.

DoH&FW ajanga COVID-19 advisory metetdaksür

Dimapur, Monupii/May 28 (TYO): Linük nung Covid-19 variant tasen - variant NB.1.8.1 case ka aser variant LF.7 cases asem puteta lir. Item variants ya Ministry of Health & Family Welfare, Government of India ajanga Variants under Monitoring (VUMs) ama observation nung yua lir.

Tang tashibo item variants ya lendong aliba category nung mali, saka China aser Asia shilem kar nung iba cases tali akumer.

India nungbo kanga bulua aliba Covid variant ji JN.1 ya lir.

India nung 2025 küm COVID-19 indang symptoms ya tesashibo masü aser mozüki nung amungtsüsa shirangba mali. WHO ajanga tawa reports agütsüba nung NB.1.8.1 ya 'low global health risk' lir. Ajisüaka common symptoms itemi jangjateta lir:

1. Temang tera metaba mesüra süksena aitba.
2. Terok tera ashiba.
3. Teni atangba mesüra neptzü ayangba.
4. Mapang mapang dry cough aliba.
5. Tekolak angoba aser tashi mait akumba.
6. Gastrointestinal upset (cases kar nung saksü-pokshir).
7. Temang tera ayangba.
8. Menemba mesüra taste samaba (tangbo kangabo mali).

9. Tangola junga mesashitetba (unless underlying issues exist). Iba dak sendakba nung jenbua alitsü aser nungdakba osang atema nüburtemi inyaksü aser meinyaksü yamai agütsür.

INAKTSÜ

1. Teti nü teka sapon agi seconds 20 shidoktsüla.
2. Nisung longsoa alodak mask agitsüla, tangola sashiba yimya tajung amshitsüla.
3. Dangar nungi pila alitsüla.
4. Nüdak yimra ama symptoms lira kidang kazütsüla aser Healthcare nung inyaker den asungdangyatsüla.
5. Aketdang mesüra hajidang nü tebang nembangtsüla aser teti kongshiba tesemtem müreka ayutsüla.

MEINYAKTSÜ

1. Symptoms aliba zübazüleme tetoktsü mesüra na temang mejungra lokti adenshidaki maotsüla.
2. Shiranger anasai maotsü merangtsüla aser teka meshidoki nü tejak nung mokongshitsüla.
3. Masks mesüra bottles ama nü meyong dangar den telemsa.
4. Osang tejangja meteta alitsüla aser na aser dangar kumzüka alitsü asoshi locak health guidelines sülen anidaksüla.

Dimapur nung May 31 nü lokti nübuttsük alitsü

Dimapur, Monupii/May 28 (TYO): Deputy Commissioner, Dimapur ajanga sangdong ka nung Dimapur District tesem ajunga nung May 31, 2025 anepdang 6:00 ako nungi tenzüka lokti nübuttsük alitsü aser ibai pre-monsoon preparedness nung shilem ka alitsü, ta metetdaksü.

Tzüngluruwa tonga arur asünung, mürekmejutsü aser kilentsü aoba lenmangtem sadema lapoka ayutsü nükjidong nung iba nübuttsük ya ayongzüker.

Iba anogo kilentsü lenmang lapokba, kisü-jensüba jana mürekba, süngolio indokba, jaka timi indokba aser nüburtemi amshiba tesemtem müreka ayuba nung rangloker inyaksü, ta sangdong ajanga ashi.

Iba anogo district nung sorkar offices aser nija institution temi pei staff anir pei office tem müreksü aser nüburtemi pei ki, kiyong aser kilentzü aoba tesemtem müreksü ayongzüker.

Dokan kibur temi pei dokan temeket müreksüla aser Village Councils aser GBs temi pei tesem nung ketdangsüa iba mapa inyakdaksütsü.

Dimapur Municipal Council, East Dimapur Town Council aser Village Council temi ketdangsüa jana indoktsü.

Dokan aser business establishment ajunga iba anogo anepdang 9:00 ako tashi shibanga alitsü metetdaksür, ta ashi.

Osangtsüsang agiteptsü asoshi helpline number 9615217798 (Wapang Longchar, DMC) nung jembitsü akok.

Tzüngluruwa atongdang nüburtemi iba mürekmejuba sentong nung shilem agitsü kanga tongtipang lir aser sorkar mapa inyaker asoshi no work no pay alitsü aser SDO (C) nem attendance agütsütsü, ta Deputy Commissioner, Dr. Tinojongshi Chang, NCS ajanga nenshia ashi.

Two-wheeler taxi permit interview results sangdongtsü

Dimapur, Monupii/May 28 (TYO): Dimapur, Chümoukedima aser Niuland district tem atema Two Wheeler Taxi Permit applicant tem interview agiba osang May 29, 2025 nü sangdongtsü, ta District Transport Officer and Secretary of the Regional Transport Authority, Dimapur, Nagaland sangdong ka ajanga ashi.

Candidates temi results ya pei district nung Deputy Commissioner office indang

Notice Board nung reprangtsü akok.

Shimtetba candidates tem dang District Transport Office, Dimapur (ISTT Complex, 7th Mile, Chümoukedima) nungi June 20, 2025 tashinung parnok indang Assurance Certificate meshitsü metetdaksür, ta ashi.

Anogo süyiba sülen certificates magütsütsü aser latetja aliba anogo tashinung certificate memeshir indang candidature agientsütsü, ta sangdong ajangasa ashi.



Operation Sindoor kubok MP, Supriya Sule-i aniba teloki South Africa nung India nungertem den jembidang tangokba noksa nung angur. Parnoki South Africa nung lenirtem den senden mena India-i kiralongra anema raratsü melungtetba metetdaksüogo.

PM Modi-i Sikkim, West Bengal, Bihar aser UP semdangtsü

New Delhi, May 28 (Agencies): May 29-30 anogotem nung Ato kilonser Narendra Modi-i Sikkim, West Bengal, Bihar aser Uttar Pradesh state tem semdangtsü. Sikkim nung Ato kilonseri project aika tenzüksütsü; item projects rongnung Namchi district nung District hospital tasen ka, Gyalshing district nung Passenger Ropeway aser Gangtok district nung Bharat Ratna Atal Bihari Vajpayee kürakyanglu densema lir.

Kass anogo nungsa pai West Bengal semdanga Alipurduar aser Cooch Behar districts nung City Gas Distribution project atema foundation lung azüngtsütsü. Iba sülen nikongdang 2:15 ako nung pa Bihar-i aotsü.

Bihar nung nikongdang 5:45 ako meta pai Patna airport indang terminal building tasenba

semzüksütsü. Terminal building tasenbaji sen crore 1,200 indoka yanglu.

Ato kilonserisa Bihta airport nung Civil enclave tasen yanglutsü atema foundation lung azüngtsütsü.

May 30, 2025 nü Ato kilonseri Bihar kubok Karakat nung sen crore 48,520 jenjang terenlok project aika tenzüksütsü aser project kar semzüksütsü. Item project tasen rongnung Aurangabad nung Nabinagar Super Thermal Power Project, Stage-II (3x800 MW), Patna-Arrah-Sasaram section four lane, Varanasi-Ranchi-Kolkata highway (NH-319B) six lane, Ramnagar-Kacchi Dargah stretch (NH-119D) aser Buxar o Bharauli na tsüngda Ganya apu densema lir.

Bihar nungsa pai Patna - Gaya - Dobhi section (NH -

22) four lane semzüksütsü aser Son Nagar - Mohammad Ganj tsüngda sen crore 1330 indoka yangluba Rail Line semzüksütsü.

Iba sülen pai Uttar Pradesh semdangtsü aser Kanpur Nagar nung sen crore 20,900 shi jenjang terenlok project aika atema lung azüngtsütsü aser project kar semzüksütsü.

Ato kilonseri 220 Yamuna Expressway Industrial Development Authority (YEIDA), Gautam Buddh Nagar nung 220 kV substation semzüksütsü aser Greater Noida nung sen crore 320 indoka yangluba 132 kV Substations semzüksütsü.

Kanpur nunga pai 660 MW Panki Thermal Power Extension Project semzüksütsü aser Ghatampur Thermal Power Project nung 660 MW unit asem semzüksütsü.

Panama nung Congress MP Shashi Tharoor-i Pakistan aitsü

New Delhi, Monupii/May 28 (Agencies): Bodhbarnü Panama yimti nung Congress MP Shashi Tharoor-i aniba Parliamentary teloki, party balala nungi tangatetba balala liaka linük atema yimtenren lenirtem ajak longjema dang lir, ta metetdaksü.

Operation Sindoor outreach mission kubok parnoki tang Panama City semdanga lir. Yangji aliba India nungertem den jembidang Tharoor-i Pakistan-i maneni kiralongrartem yaria India amakba atema Pakistan sashia aitsü.

Tharoor-i, "Tia makai, arrtsü adener aliba medemertemi amalitep masür. Parnoki asenok maneni amaktsü telemtetba agir, kechiyong parnoki asen

meyong litsü aginer," ta ashi.

Panama assembly nung Tir Dana Castaneda aser MP tem den jembidang Tharoor-i, April 22 nü kiralongrartemi Pahalgam amakba sülen Pakistan-i kiralongrartem anema inyaksü, ta bilema India-i ataa liasü; iba sülen ang May 7 nü India-i Operation Sindoor agia kiralongrartem amak, ta metetdaksü.

Tharoor-i, "Parnoki (Pakistan) kecha meinyakba agi hopta ana lir sülen May 7 nü onoki Pakistan telung nung aliba kiralongrartem headquarters amak. Onoki rara tenzüksü mejangrar saka kiralongraba atema temerenshi magütsüi meyutsütsüla, ta onoki telemtetba agia liasü," ta metetdaksü.

Shashi Tharoor-i,

kiralongrartem aser Pakistan-i India maneni amaker, aser ibaji parnoki New Delhi nungi yimsüsüba litsü balala, talisa Kashmir aginüba agi lir, ta ashi.

Shashi Tharoor-i aniba telok nung züngsemtemji Sarfaraz Ahmed (JMM),

Tejasvi Surya (BJP), Ganapati Harish Madhur Balayogi (TDP), Shashank Mani Tripathi (BJP), Bhubaneswar Kalita (BJP), Milind Deora (Shiv Sena) aser taoba mapang I n d i a n Ambassador to United States, Taranjit Sandhu nungir lir.




Jakarta, May 28, 2025: Bodhbarnü MP, Sanjay Kumar Jha-i aniba Parliamentary telok Indonesia yimtiba, Jakarta tonga aoba sülen tangokba noksa nung angur.



OFFICE OF THE
CHUNGZIA LAISHIR TELUNGJEM
Mokokchung, Nagaland

TENÜNGSANG AGÜTSÜR



Sd/-
Lolenlemba Imchen
President

Tsüngrem tenzüksüba wadang nung samanir wabong, **Rev. Dr. L. Kari Longchar-i** Rev.Kejungluba Lifetime Ministerial Award 2025 anguba ajanga Chungtia Laishir Telungjem aser Chungtia sensosanger ajak nem tenüng tajung bener arütsü nung, pa nem tenüangsang tulu agütsür. Ozü lenir-i tenzüksüba wadang nung Arogo aser Naga nüburtem asoshi aremzüksü aser bendanga agüja inyakba ajiteta, pa mapa alang iba sempet tetushi agütsü nung Ao Theological Association danga kanga pelar. Tsungremi maneni lenir taküm arishi aser anema aliba moajang. Ano pa mesüka Aoer Laishir rongnungi jenti adokdakjang ta ozü sarasadem.

Sd/-
L. Kathyla Longchar
Secretary

Iran nung samaba India nunger asem bushidar: Indian Embassy

New Delhi, May 28 (Agencies): Bodhbarnü Iran yimtiba, Tehran nung aliba Indian Embassy-i, Iran nung samaba India nunger asem bushitsü atema embassy-i Iran ketdangsertem den senteper maparen tenzüksü, ta metetdaksü.

Indian Embassy-i sangdong ka ajanga, samaba India nunger kinüngertemi Embassy dang parnok ajungbena samaba osang metetdakja liasü, ta metetdaksü.

"India nunger asem kinüngertemi Indian Embassy dang parnok Iran-i aoba sülen

samaba osang metetdaksü," ta sangdong nung shia lir.

Iba sülen embassy-i Iran sorkar den senteper India sensotem bushi tenzüksü.

"Embassy-i iba tebilemtsü onükji Iran ketdangsertem den lemsatop aser samaba India nunger bushia kümzüksü mepishiogo," ta sangdong nung shia lir. "Onoki samaba kibong züngsemtem den maneni tongtepratepdar aser embassy-i inyakba osang metetdakja arudar," ta kasa sangdong ajanga metetdaksü.

Tanu Gujarat, Rajasthan, Punjab aser J&K nung Mock Drills agitsü

New Delhi, May 28 (Agencies): Brihostibarnü Pakistan linük den arrtsülen aliba state pezü-Gujarat, Rajasthan, Punjab aser Jammu & Kashmir nung civil defence mock drills agitsü.

Mock drills agiba nükjidongji kiralongra tatalokbatem aser Pakistan den raraba mapang nung

ketdangsertem tsüngda amalitepa inyaksü aser civilian aienshidaksütsü atema renemshitsü atema lir, ta ketdangsertemi metetdaksü. Mock drills nungji civil defence teams, police, disaster response units aser medical staff temi shilem agitsü, ta ketdangsertemisa metetdaksü.



NATIONAL COUNCIL OF EDUCATIONAL RESEARCH AND TRAINING (NCERT), NEW DELHI

Admission to Various Teacher Education

Programmes of Regional Institutes of Education

Advt. No. 515

Dt. 27.05.2025

In continuation to this Institute's Advertisement No. 513 dated 15/05/2025, online applications are invited from the eligible applicants for admission into various Teacher Education Programmes, viz., (i) B.A.B.Ed. (4 Year) (ii) B.Sc.B.Ed. (4 Year) (iii) M.Sc.Ed. (6 Year), (iv) B.Ed. (2 Year), (v) B.Ed.-M.Ed. (3 Year), (vi) M.A. (Education Technology) (2 Year) (vii) M.Ed. (2-year) run under Regional Institutes of Education. The on-line application form will be available from 29/05/2025 to 17/06/2025 in the websites of NCERT and all RIEs. Candidates are advised to read the Prospectus and other instructions carefully available in the websites before filling the online application. Common Entrance Examination (CEE) will be conducted at various centres across the country on 29th June, 2025 (Sunday) through Computer Based Test (CBT) mode.

Activity Schedule for Registration:

Registration Link & detailed information shall be available in the websites of NCERT and all the RIEs	https://ncert.gov.in/ https://www.riebbs.ac.in/ https://rieajmer.raj.nic.in/ https://riehopal.nic.in/ https://riemysore.ac.in/ https://nerie.nic.in/
Starting date of online registration	29-05-2025
Last date of online registration	17-06-2025 (11:55 PM)
Date of Common Entrance Examination (CEE)-2025 (CBT)	29-06-2025* (Sunday)

*Subject to change by notification in CEE Portal available in the websites of NCERT and RIEs

Principal
RIE, Bhubaneswar



TIR YIMYIM YIMOBILEM (EDITORIAL)

DIMAPUR THURSDAY, MAY (MONUPII) 29, 2025

Bendanger nokdangba mapang

Taküm 2025 küm January nung United states nung Donald Trump 47 buba tir kümer külen nungi balaka US nung temelaba melii alir bendangertem ajak meindokba sülen, India nunga temelaba melii bendangertem arua ali mali tesem ajaklen mita aotsü tenzükogo. Atangji, US nung bendangertem temelaba melii melidaktsütsü asoshi mita aoba ya kecha kin aser tamangba yimsü balaka mejeteta arishiba mali saka US senso masüba purtem ajakji US government atema bendangertem lir. Iba telemtetba ajanga India nungertema aika US nung temelaba melii alirtem meyipa yokba asenoki angashiogo. Kasaji, tang ya India nunga state shia nung temelaba melii alir bendangertem mita bushiba mapang lir, ajisüaka India nungbo, talisa, Bangladesh nungi arur Muslim nungertem dak tenük yoker. Aji oda, India tesem balala nung Bangladesh nungi arua India nung temelaba melii alirtem puteta meyipa yokba osang asenoki angashir. Atangji, bendang lima balala nungi temelaba melii arua India nung alirtemjia mapa tamajung inyaktsü bilema amongerbo masütsüa akok, kechiyong Bangladesh nungi arur Muslim nungertem ya teimbaka India nung arua ayangertem lir. Aji oda, tanübo India tesem aika nung Hindu nungertema Bangladesh nungi arur Muslim nung ayangertemji melira alu inyaktsür malitsüa akok mesüra kiojen yanglutsürtem agia anüngtsü. Ajisüaka, koba lima nung südirsüaka, senso purtem taküm alitsü asoshi inyakba mapatem ajak bendangertem dak dang nendaka ali tashi, senso purtemji memetetika bendanger kübok alir asütsü. Iba ama mapang ka nung Nagaland nunga Dimapur nung dena Inner Line Permit amshitsü tenzükba telemtetba ya,, menur süaka, mapang shitak ka nung tenzükba asütsü. Aji oda, Nagaland-sa süaka tamasayongi Dimapur nungbo ILP mamshii aruba ajanga India nungertema teliner tashibo tenokdangba kecha melii arua sademsadema lia arur aser aliba dang masü saka yashi arur dena ali kimung alia Nagaland senso akümba angur. Iba jagi Dimapur yabo Nagaland-a memesük asenok nüngdak ajak madak tsümar kibur kümer asenokang par lima nung ayanga alir amato kümogo. Aji oda, lia lia, joko asenokang parnok melii melitetsüsaba tia ka nung asenok alir. Aji oda, asenok anogo shia taküm chiyongtsü metsü mersü aser alo beas nungi tenzükba jangotsü aser shi angok ajak asenok lisopurtemi bendangertem dang nungi alir, anungji bendangertemi anogo ka dokan melapok nung asenok lisopurtem chiyong athitsüba tensa ka nung asenok lidagi. Kasaji, bendangertem melira asenok lu inyaktsür malitsü aser kisüjensü mapa meinyaktetsüsa akümtsü. Tetezüji, asenok ya asen lima nung asenoki memeteti bendanger kübok alir ta asenoki angatetsüla. Atangji, asenok dang bendangertemi malik-bo ajar aser sahib aser memsahib jaa salem agütsür saka shitakba asen li aser asen rongsen madakbo parnokang malik aser parnokang sahib aser memsahib-temji lir. Iba ama bendanger kübok asenok kilir ama kümer aliba jenjang nungi asenoksasa salatsü asoshi, kangabo memenu dang, asenokia timtem terabo agia bendangertem melenaji aseni akokba mapatembo asenoki inyaktsüla. Atangji, Nagaland nung bendangertem shinga arua malitsüla ta masü saka temelaba agir arua alitsüla. Aji oda, Nagaland nungsa süaka yashi tashi Dimapur nungbo ILP mamshii aru, anungji taruner temang nungoka arua aliba agi shibabo senso aser shibabo bendanger mejangjatet ajak senso kümer lia aruogo. Idakji Naga nungertema maparen aika nung akoksaogo. Ajisüaka, tang nungi danga Dimapur nung ILP amshi tenzükra, iba jagi bendangertema temelaba melii sademsademabo arua melitetsü. Ashiko, Dimapur nung arua ayanger bendangertem yabo Bangladesh nungi arurtem teimba asütsüa akok. Item yabo Muslim nungertem, anungji tebur kati tetsür asem pezü agir aser kecha tazükba mali, anungji khen nung nütüng aika renloker alir. Tanü India nung aji tsübuteper. Aji oda, tang nungibo India nungertema asoshi Dimapur nung dena Nagaland nung arua amongtsü asoshi ILP nüngdaktsü aser India nungertema masüba bendangertem asoshi ano temelaba balaka Restricted Area Permit (RAP) nüngdaktsü. Tongtibang kaji, ILP ajanga arurtemi dokan lapoka amentsü makoktsü aser ali alitsüa özüngi memelar. Aji asenoki meteta inyakra, asenok ajangzüktsü saka ILP amer senso kuma lidaktsüra, ILP amshibaji nükjidadong makaba mapa ka asütsü.

OLEMSABANG



(Yashi adok nungi...)

Kaket Züluba

Walking the Path of Hope and Despair: NBCC's Endeavor on Peace and Reconciliation. Two Volumes. Compiled & Edited by Rev. L. Kari Longchar, NBCC, Kohima, 2011.

Naga Lima Yimjung Atema Rev. L. Kari Longchari Shilem Agiba Tongtibang Kar

1. 1986 nungi Youth Educator inyakdang Ongpangkong Sannükertem den Kinunger Arogo, Settsü yimtsüng aser Longkhum -Mangmetong mepetmesü yimjung yanglua jaja.
2. 1991 nungi ABAM nung aliba mapang Factional killing tongtibangsa NSCN -IM o NSCN -K nati public kanga merenshidang ABAM aser NBCC-i yimjung mapa nung Nagaland, Assam, Manipur, Thailand. U.K. sema senzü.
3. NBCC-i- yi noktangba wadang nung yaritep.

Tongtibang Tatalokba Kar:

1. Ao Arogotsür Mokokchung DC Office mekütpanger ayimtendang Aenjeti (Jan) 4, 1989 sayatenya tulu atalok aser idangjisa DC-i Mokokchung district Dry District sangdong.
2. 1989 yi anema Hunger Strike anogo pezu (4) Kohima nung akatsü anasa ABAM Prohibition Implementation Committee Chairman Mr. O. Yashi Jamiri anir Zulu Jamir, Sashi Virgil, Ariküm, Lanupangjung onok teroki Chief Minister den meeting akadang Tsüngremer tesumgmangtsü mapa jungkai adok.
3. 1996 NSCN IM- i Phek nung, Gen. Povoza kaset aser Phek Public-i 'QUIT Tangkhul' notice agutsü. Ano IM-i execution of 24 Chakhesang leaders Azah sangdong. Idangji Armytemi NSCN arishiba mapang onok Niuland arem, tzülu teperem tashi ayong ajangdanga nemzür C-in- C ajuruteta yimjung adok.
4. Iba kesa tensa Peace and Unity Mission Tour Angami, Konyak, Ao Executive Secretary S.S. Khaplang aser General Kholi ajurui Burmai aidang anogo pezü lenmang makadak min nung jaja. Parnok nem Naga nungertema tsüngta meraratsü saka lungjemtsü osang agutsü.
5. 1995 Ao lima ya NSCN-K o NSCN-IM na battlefield ka aküm. Mangmetong tongbang rara tenzük. Yim teyong nung NSCN-K Col. Laichai anir parnok Camp yanglur liasü. IM tem atsüka ali. Yimtsüng meketa Indian Army-i lungpang. ABAM nungi R J Amen, N. Toshi, R. Teka, Imtitoshi Jamir, Saku Driver, onok terok yim nungi nenok ainshiang ta ashitsü Mangmetongi ai. Joko khatep tenzük. Yimjung Nisan apur parnok tetsüngtai ir khatep anenang, pakshiang ta ayimtena onoki sarasadem. K pur ana kaset. Laichai onok dang kangasa ain adok. Onok Mokokchung tonger K teloki shibang.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Africa Bible Commentary tanabuba 'edition' meshiteta sayaogo



Kenya yimtiba, Nairobi nung 13buba Association of Evangelicals in Africa (AEA) mungdang nung AEA Tir tasenba, Rev. Dr. Jean Libom Li Likeng leniba nung evangelical lenirtemi Africa Bible Commentary tanabuba edition meshitetba mapang tangokba noksa nung angur.

May 26, 2025: Kenya yimtiba, Nairobi nung 13buba Association of Evangelicals in Africa (AEA) mungdang nung AEA Tir tasenba, Rev. Dr. Jean Libom Li Likeng leniba nung evangelical lenirtemi Africa Bible Commentary tanabuba edition meshiteta sayaogo.

Evangelical lenirtemi, Africa Bible Commentary (ABC) tanabuba edition ya Africa nunger meyong aser iba ya Africa Arogo nung tanela nüngdak peritsütsü atema adok, ta ashi.

Mezüngbuba Africa Bible Commentary ji 2006 küm adoka liasü aser tang tanabuba edition ya adoktsü atema tesüiba küm 8 agia liasü.

Langham Literature nung Africa atema Regional Coordinator, Professor Elizabeth Mburu-i, "Africa Bible Commentary ya nenok project ka lir aser parners aikati nungiter, ajisüaka iba ya AEA meyong lir," ta ashi.

African Bible Commentary tasenba nung tan putu den apet ocet 122 densema lir, aser iba nungji social media, reshikangshi, matamabensar, atsüapong, pastor kibong aser digital dak sendakba ocettem densema lir. Talisa ocet zülur tasenpur 53 nungi 21 bo

tetsürtem lir.

Commentary editors rongnung ka, Professor Nathan Chiroma-i, iba commentary ajanga tanü putu nung tayongzükba balala koktettsü atema pastor tem aser lenirtem yaritsü, ta ashi.

Laisa, "Item ocettem ajanga asenoki bushiba telangzüba balala metettsü aser tanü putu nung tayongzükba balala bentettsü atema local pastor tem yaritsü," ta ashi.

Professor Mburu-i, "Iba commentary ya Laishiba nung ajemdaker renemba lir, kechiyong tashi tulutibaji Laishiba lir," ta lai ashi.

AEA General Secretary Rev. Dr. Master Matlhaope leniba nung Africa Bible Commentary meshitetba sentongji agi aser AEA Tir leniba nung iba Commentary meshiteta sarasadem.

Mezüngbuba African Bible Commentary dak sendakba nung AEA nung mezüngbuba African General Secretary, Byang Kato-i, African Arogo ya "theological anemia" agi shiranga liasü, ibayongji Arogo lenirtem aser Khristan lenirtem lenitsü atema African Bible Commentary adoktsü pai ajungshia liasü, ta ashi.

AEA General Secretary

Rev. Dr. Master Matlhaope-i, "Iba nükjdongji yur mezüng tenzükertemi mezüngbuba Africa Bible Commentary adok aser kasa temelungtetba nung tanü editorial team-i edition tasenba adoker," ta ashi.

Paisa, "Iba ya ajanga Africa tesem ajaklen temelenshi adoktsü asenoki sarasadem," ta ashi.

"Asenok longjemer iba commentary atema sarasademtsü maongka anguba ya jangratemtsüka lir. Iba commentary ya seminaries, kija tekülem aser national alliances ajak nung amshitsü ni ajungshir," ta pai ayongzük.

African Bible Commentary English edition ji taküm October ita nung sayatsü. Tang French, Portuguese aser Swahili oshitem nunga iba commentary meyipzükdar.

Oshi balala nung iba commentary meyipzükba maparen ajak tembangba sülen sangküm Addis Ababa nung sentong tuluka ayongzüka agitsü tebilemba lir.

Professor Mburu-i, "Tarutsü Arogo tiaji asenok ket nung lir. Anungji Arogo yanglushitsü teinyaktsü wadangji asenok khuret lir, aser iba atemaji Africa Bible Commentary ajanga tuluka yaritsü," ta metetdaksü.

Indonesia linük nung Khristantem leper aika raksatsüogo

May 28, 2025: Indonesia kübok Special Region of Yogyakarta nung May 16 nungi May 19 tashi nung Khristantem tasü mang aremba aika raksatsüogo, ta osang ka ajanga metetdaksü.

Java island nung Yogyakarta kübok Baturetno yimdak Ngentak Public Cemetery nung Khristan ter leper raksatsü aser Yogyakarta nungsa Purbayan yimdak Baluwarti Public Cemetery nung Khristan pongu leper raksatsü.

Ngentak Public Cemetery nung Khristan leper ka raksatsüba dak sendakba nung asür ka kinüngtsü Sri Hana Sukarti-i, "Asür ka kinüngtsü ama leper raksatsüba atema ni

jashir. Amongnü Tenla kidang nungi meyipa aruba sülen ang kü kinüngbu leper raksatsüba osangji ni angazüka liasü," ta metetdaksü.

"Kü kinüngbu nunger kinünger ka leper merüktettsü aoba ajanga ibaji meteta liasü. Pai kü kinüngbu leperji kanga mejungi raksatsür angu. Muslim yimsü mamanger tangartem leper-a raksatsür liasü," ta laisa metetdaksü.

Yogyakarta nungsa Panggunharjo yimdak nunga leper ana raksatsür liasü. Jaranan nung Khristantem leper nung aliba Kangki raksatsü.

Surabaya nung aliba Indonesia Bethel Church (Gereja Bethel Indonesia, GBI)

nung pastor, Putu Praba Darana-i, item mapa ya yimsü nung ajemdaker inyakba asütsüa akok, ta ashi.

Osangbener den jembidang pastor-i, "Iba tatalokba ya yimsü nung ajemdaker inyakba asütsüa akok, ajisüaka aibelensang jagi yi mesüra temesepba mozü chir inyak asü masüar ibaji bushisüngdangtsü nüngdak," ta ashi.

2018 küm December ita nunga Yogyakarta kübok Purbayan yimdak Arogo meyong leper ka nung Kangki aika raksatsü. 2019 küm April ita nunga Yogyakarta kübok Sleman nung aliba Bethesda Mrican Cemetery nung Khristantem leper raksaja liasü.

ANOGO ABEN TSÜNGREM DEN

Tetsü tamang

"Idangji Yisui la dang ashi, o tetsür, ne tamang tulu lir : Nai mulungba amaji ne dang inyakang" (Mt. 15:28)

Laishiba nung tebur aser tetsür tamang tulu akaba indang otsü aika lir. Item rongnung, tetemsü tetsütemi Tsüngrem dak tamang katetba aser ayuba Lai otsü nungji kuli lir. Tetsütem tamang ajanga parnok taküm nung dang temelenshi bener arubaji masü saka lokti libaliru ajak nung temelenshi bener arur.

Yangi, Kanantsür tetsü kati tamang tulu yur, Yisu dang ayimtena mepishiba angur, Yisui bo la nüngtakji atalokdaksütsü ta tamang tulu liasü; anungji lai Yisu dak amangtetba aser tamang katetba ajanga, Yisui la jala shiba temenen tanela agi pua liasü la nem nüchi agütsü aser temenen talenba nungi salatsü.

Tanü asenok rongnung, jabaso, jala aser kinüngbo asoshi khuret bentetba, Tsüngrem taochi bushiba, teimla akaba tetsü lirabang, lokti aser Arogo nung tesünep, temoatsü akaba kibong ka ka asütsü. Tanü alimai yimlaba aser aginübaji : tamang katetba tetsü, ochishia amangba tetsü, bendanga agütsüba, sarasadem, temeim aser tenla agütsüba tetsutem alitsü.

Reshikangshi kanga liaka Asia nung Khristan nütsüng arener

May 28, 2025: Asia tesem agiba nokdanger aser loktiliba balala nung Khristantem kanga nungi sendoker. Ano linük kar reshikangshir, ajisüaka Khrista nungbo Khristan yimsü dangi osangtajung maneni prokba meyipba ozüng ajanga aikati Khrista agizüker, nokdanger.

Item ama reshikangshi jenti liaka Asia nung aliba linük aika nung Khristan nütsüng renlokdar. Mission organizations aikati, China nung nütsüng shilem 6 shi Khristan aliba tangbo nütsüng shilem 9

Khristan researchers, missiologists aser missions organizations aikati Asia tesem balala nung Khristan nütsüng arenba osang metetdaksüogo.

ICC-i, "2024 küm Asia nung Khristan nütsüng million 415 liasü aser ibaji Asia nung nütsüng shilem 8 shi lir. Iba denji medemdangra 2010 küm Asia nung Khristan nütsüngji shilem 3 shi dang liasü," ta metetdaksü.

"Asia nung Khristan nütsüng tanem-tanemi renlokbaji tanela nung tzüraba, Khristantem teyari, missionary mapatem aser Khristan yimsü ajanga sobaliba balala agizüktetba kulitem ajanga lir," ta mongintemi metetdaksü.

2020 küm nungi 2025 küm tashi nung küm shia Khristan nütsüng arenba shilemji 1.6 shi lir.

Asia nung aliba linüktem aika nung Khristan tesayubatem magizükteter. Linük aika nung Khristantem dak azüker, tepseter, amokmerener, jail nung puoker, tekülem sentong

agiba nokdanger aser loktiliba nungi sendoker. Ano linük kar nungbo Khristan yimsü dangi meyipba ozüng ajanga nokdanger.

Item ama reshikangshi jenti liaka Asia nung aliba linük aika nung Khristan nütsüng renlokdar. Mission organizations aikati, China nung nütsüng shilem 6 shi Khristan aliba tangbo nütsüng shilem 9 Khristan lir ta asadangteter.

China nung Khristantem aika underground nung adener, iba jagi Khristan nütsüng kwi aliar tejangja memeteter. Ajisüaka tang China nung Khristan nütsüng million 85 nungi million 130 shi alitsü südi, ta asadangteter.

South Korea nunga 1960s mapang nungi tenzüka Khristan nütsüng kanga renlokogo. Bendangleni missionary tem teimba yokba linüktem rongnung United States sülenbo tanabuba jenjang nung South Korea lir.

Mongolia nunga 1990s nungi 2000s tashi nung Khristan ishika dang liasü ajisüaka tangbo iba linük nung Christian fellowships aser Arogo noklang aika kümogo.

Yamaji Communist, Buddhist aser Islam nütsüng teimba aliba linüktem- Laos, Malaysia, Indonesia, Vietnam aser Myanmar nunga Khristan nütsüng kanga renlokdar.

AO OSHI ANGAZÜKDAK:**TANÜ ANGAZÜKTSÜBA OJANG****Tenet**

(n) züngdangba terok ser ka tali (seven)

* Küm nung ita tenet bubaji Chiteni asütsü.

Tengaja

(v) tsülubanglua tangar meinprongba jakla (character of spoiled child, indulgence)

* Tengaja tanuri tangar medemer memeneptsü.



Tir Yimyim

OLONG PAITEP # 7165

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonung chiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7164 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,


14. Jala.

NAI-A YA METETTER MA

Arishi küm 55 tain Nepali nungur Kami Rita Sherpa-i pa indang world record ajatetogo. Alima nung tenem kolak talangtiba Mount Everest-i 31 ben atuba atema Kami-i otsü tasen yanglutet.

Kami Rita dang "Everest Man" ta ajar aser May 27, 2025 nü pai 8,849-metre (29,032ft) tenem kolak atong.

Kami ya Sherpa guide ka jabaso lir aser 1994 nung pai mezüng Everest kolaki atu.

Assam sorkari Pahalgam nung tepsetertem nem teyari agütsür

Guwahati, May 28, 2025 (Agencies):

Pahalgam kiralongraba lendong nung Maharashtra nungi tasür kibong asem liasü aser Assam sorkari parnok nem senotsü teyari agütsüogo.

Assam minister Chandra Mohan Patowary-i tasür kibongtem den ajuruteper aser senotsü teyari agütsü ta Chief Minister's Office (CMO)-i metetdaksü.

April 22 nü kiralongrartemi

Pahalgam amakdang tepsetba kibog 26 prong shia nem Asam sorkari Rs 5 lakh teyari agütsür

"Minister Chandra Mohan Patowary-i asür Hemant Suhas Joshi, asür Sanjay Laxam Lele aser asür Dilip Jayaram Desale kibongtem semdanogo. Parnok kibong shia nem Assam nung alirtem tenüng nung Rs 5 lakh teyari agütsüogo" ta CMO-i ashi.

"Pahalgam nung Kaustubh

tepsetba ajanga par kibong nung ongdang tulu ka adoka lir. Tanü kü den külemi inyaker Patowary-i Pune nung par kibong den ajuruteper aser Assam nung alirtem tenüng nung mangyimba lemsatepogo" ta Chief Minister Himanta Biswa Sarma-i ashi.

Assam nung Cabinet minister temi linük kübok tesem balala nung Pahalgam nung tepseter kibongtem den ajuruteper senotsü teyari agüja arur.

Indo-Bangladesh arrtsülen BSF-BGB tsüingda mepetmesü adok

Guwahati, May 28, 2025 (Agencies):

Assam kübok South Salmara Mankachar district nung Indo-Bangladesh arrtsülen Border Security Force (BSF) aser Border Guard Bangladesh (BGB) tsüingda mepetmesü adoka raratep.

Mongulbarne Bangladeshhi nungur telok ka India lushii aitba sülen Thakuranbari area nung BSF aser BGB tsüingda mepetmesü adoka liasü.

BSF sepaitemi Bangladeshhi nungurji meyipa yoktsü merandang BGB sepaitemi zero-line nung tekong meranga noktak aser idangji parnok raratep.

Iba mapang BGB sepaitem India lushi telungi ait aser iba jagi linük anaprong nungi tongti ketdangsurtem tiyongtsüi ia tensa

süingjemdaksü.

Mongulbarne 3:00 ako meta Bangladeshhi nungur telok ka India lushii aittsü aliba noktangtetogo ta BSF-i sangdong ka nung ashi.

"BSF sepaitemi ozüing alema arurtem noktang aser parnok Bangladesh-i meyipa yok" ta BSF-i metetdaksü.

Thakuranbari nung alirtemi ashiba agi Bangladeshhi nungurji linük ana tsüingda "no-man's land" nung anendak. BSF-i telok azüoktsü atema rubber bullets khaloktsü ta parnokisa ashi.

Assam ajungalen ozüing alema aruba Bangladeshhi nungur anema inyadkak iba ya atalokogo. Tawa tu Assam police-i district balala nung ozüing alema arur ta temulung melemi bilemer nisung 150 tema pua lir.

Deobarnü Golaghat kübok Numaligarh area nung Bangladeshhi nungur 22 apu. Parnok ya local industries nung mapa inyakttsü anioka liasü.

Kasa mapa ya Guwahati, Morigaon, Sonitpur, Cachar, aser tanga district tem nunga inyakogo.

Iba mapa inyakba atema All Assam Students' Union (AASU)-ibo state sorkar nem tenüingsang agütsüogo aser parnoki ozüing alema arurtem meyipa yoktsü akhanger.

Ajisüaka, Congress aser All India United Democratic Front (AIUDF) ama opposition party temibo iba mapa aittsür. Parnoki ashiba agi sorkari immigration enforcement tenüng amer India sensotem nem timtem agütsür.

Manipur nung hopta ka tsüingda telungpur 13 apu

Imphal, May 28, 2025 (Agencies):

Manipur nung Indian Army aser ozüing amertemi maparen balala inyaka arudang hill aser valley nung telungpur telok züingsem 13 tashi puogo.

Indian Army den Assam Rifles, Manipur Police, CRPF, BSF, aser ITBP ajanga taoba hopta Kangpokpi, Senapati,

Imphal East, Imphal West, aser Thoubal district tem nung intelligence-driven operations inyak ta Defence Wing-i ashi.

Imphal West district nung sepaitemi Phayeng tesem nung mita aodang 7.62 mm SLR, .303 rifle, 9 mm pistols, ammunition aser military equipment ngutet.

Kangpokpi district kübok Pholjan-Tingkhai village nunga

parnoki mita aodang prangpong 14 ngutet. Iba nung Self-Loading Rifle (SLR), Double Barrel Breach Loading shotgun, bolt-action rifles, improvised mortars, pull-mechanism rifles, aser injangtem dena liasü.

Senapati district nunga security forces-i Marenmai area nung mita aodang prangpong pezü nguteta liasü.

Israel-i Yemen yimtiba Sanaa airport amak

Jerusalem, Monupii/May 28 (Agencies): Israel-i ashiba agi, parnoki Yemen nung Houthi pur tamendakdak balala den Sanaa international airport nung iba teloki amshia aliba tayimtsü tatembangbuba raksatsüogo. Houthi puri Israel dak missile ana khaloktsüba sülen parnoki iba telangzüba agüja liasü.

Sanaa International Airport General Director Khaled al-Shaief-i X nung post ka ajanga ashiba agi, iba airport amakba sülen Yemenia Airways indang civilian tayimtsü tatembangbuba ajunga raksaogo.

Iba ya Yemen nung airport tulutiba lir aser Israel-i amakba sülen raksar aliba yanglushia taoba hopta nungiang inyaksangshi tenzüker liasü.

Airport ya U.N indang tayimtsütem aser Israel-i raksatsüba tayimtsü yagi amshia liasü. Iba ita tetenzüklen

iba airport amakba mapang Yemenia Airways tayimtsü asem raksatsüogo.

"Iba ya osang tejangja ka agütsüba aser onoki benoka aliba police maneni benokyonga aoba ka lir; shirnoki Israel dak injang khaloktsüdir parnoki temenok aika agütsütsüsa akümtsü," ta Israel defence ministry-i ashi. Ken o dak sendakba nung Houthi puri kecha telangzüba magütsü.

Houthi telok ya Iran indang "Axis of Resistance," nung shilem ka lir kong Gaza nung Hamas aser Lebanon nung Hezbollah densema lir. Houthi telok yagi Yemen nunger nütsüngyongsük shilm 60 aliba tesem amokbanger lir.

2023 küm October ita Gaza nung rara tenzükbä sülen iba telok yagi Palestine nungertem pusema Israel kübok tesem balala amakba den Red Sea

nung Israel den sendaka aliba rongtem maka arudar.

Parnoki khaloktsüba missile aser drone tem timba khadangogo, mesüra metongi tsükogo. Israel-ia meyiper Yemen nung iba telok tamendakdak balala maka arudar.

Kasa mapang nung US-ia taküm asendenshir Houthi pur maka liasü, saka iba telok yagi US nunger indang rong mamaktsü nangzükba sülen anenogo.

Israel Ato Kilonser Benjamin Netanyahu-i Bodhbarnü ashiba agi, Israel anema jenjang agira telangzüba tesashi agütsütsü.

"Ni aiben shia aruba ama Houthis pur ya symptom dang lir. Parnok rongshirjibo Iran lir aser parnok inyakyim ajanga Yemen nungi Israel anema jenjang agia arudar," ta Netanyahu-i ashi.

Trump aser Putin den külemi ajuruteptsü mulunga lir: Zelenskyy

Kyiv, Monupii/May 28 (Agencies): Moscow-i küm asem amakba anendaktsütsü asoshi Ukraine Tir Volodymyr Zelenskyy-i maneni meranga lenmang balala bushiba nung shilem ka ama US Tir Donald Trump aser Russia Tir Vladimir Putin den senden amentsü mulunga lir ta ashi.

Zelenskyy-i yimya balala nung ajurutepa jembitsü mulunga aliba lemsatepa, "Putin-i linük ana kisüng senden nung adentsü temulung mesadokra, mesüra nisung ajaki linük asem tsüngta senden mendaktsünüra, ni jashia mali. Yimya balala nung amentsü ni renema lir," ta ashi.

Iba dak alia Zelenskyy-i ano Donald Trump dang Russia indang banking aser energy sectors nung temerenshi/tenokdangba tesashi agütsüdaktsünüa ashi. Russia-i tayimtsü amshia amakba tali akumba aser maneni ceasefire alitsü memulungba mapang ka nung pai iba olen ya ashi.

Ukraine nung yimjung alitsü asoshi inyaktepba nung terenlok makai anendaka aliba atema Vladimir Putin-i "mi den asayar" ta Donald Trump-i aitsüba sülen Zelenskyy-i iba o ya ashi.

Russia-i tayimtsü balala amshia Kyiv amakba sülen Donald Trump-i taoba hopta tatemlen Kremlin lenir ya "tamachi nisung" ta aija Moscow dang ano temerenshi tasen agütsütsü ta tekum dangtsü shia liasü.

Donald Trump-i pa indang Truth Social network nung, "Ibai ni atema masü asübo Russia nung tamajung jenti ataloker lila ta Vladimir Putin-i mangateter, aser ni ashibaji KANGASA TAMAJUNG. Pa mi den asayar!" ta zülua liasü.

Donald Trump-i Moscow nem tenokdangba/temerenshi

tali agütsütsü asadanger ama sayuogo aser White House-ia pai lenmang ajak lapoka lir ta ashir.

White House press secretary Karoline Leavitt-i sangdong ka nung tang rara aliba ya taoba US Tir Joe Biden meshidakba ajanga lir ta ashi. "Iba rara ya Joe Biden tai, aser Tir Trump-i yimjung tenzüngzüktep ka aginer ta jangja-jangja shia lir. Tir Trump-i lenmang ajak lapoka yuja lir," ta lai ashi.

Russia-i Ukraine amak tenzükbä sülen Joe Biden-i tenokdangba/temerenshi jenti agütsü, saka Donald Trump-ibo yamaji meinyak aser Russian banks nung takoksa tulu agütsüogo ta ashir.

Kasa mapang Ukraine Tir Volodymyr Zelenskyy ya German Chancellor Friedrich Merz den ajuruteptsü lir, kechiaser United States-i anir rara tatem kati arutsü asoshi meranga jembishinüaka Russia-i tawa bomb tali poklokja amakba ajanga Ukraine ya mitkar teyari tali bushir.

Bodhbarnü Berlin nung jembishinü alidang Zelenskyy aser Merz na Russia nem temerenshi agütsütsü asoshi jembishinütsü imlar.

Germany sorkar indang odongtari ashiba agi, Merz-i Zelenskyy ya anüngdang 10:00 ako (par mapang) nung military konang tetushi agüja federal chancellery nung agizüktsü.

May ita tetenzüklen Turkey nung Russia aser Ukraine ketdangsürtem ajurutepa senden amenba sülen Berlin nung jembishinü akatsü.

Mongulbarnü Merz-i rara tembangtsü asoshi tekeraba nung pangzüng ka yanglutsü teimla mangur ta ashi aser tangbo Russia Tir Vladimir Putin-i ceasefire mesüra

yimjung tezüngzüktep jangra mali ta ashi.

"Tetetzü Ukraine-i maneni par linük kumzüka ayutsüla aser Ukraine-i aji inyaktettsüsa asenoki yaritsüla."

German leniri iba rara ya Ukraine indang litsü-lika atema kisüng masü ta ashi.

"1990 sülen Russia den külemi asenoki amenokba political order tamedak dak nungi anokshitsür," ta pai ashi.

Anogo ka tejakdang, Hombarnü Merz-i ashiba agi, US aser United Kingdom densema Ukraine indang Western allies tongti temi Kyiv nem nok-nü agütsüba nung tenokdangba magütsür.

"Iba tetetzü Ukraine-i tangbo par sasa par linük kumzüka yutettsü, tatishitsü agi, Russia nung military positions maktettsü... Ajisüaka kar dak alaka tanü tashi yamaji meinyaki arur. Tangbo aji inyaktettsü," ta pai ashi.

(Maneni tapak 8 nung...)

Golden Dome atema Canada-i USD 61bn agütsütsüla: Trump



Washington, Monupii/May 28 (Agencies): United States Tir Donald Trump-i ashiba agi, pai Canada dang pai benoka aliba Gold Dome missile defence system nung densemstü atema parnoki USD billion 61 agütsütsüsa akümtsü ta shiogo.

TruthSocial nung post ka ajanga Trump-i ashiba agi, Canad-i iba Golden Dome System nung kanga denner aser parnok US nung denra angati dang amshitettsü.

Canada ya state 51buba kümra tang benoka aliba defence system atema Canada-i dollar ka danga magütsütsü," ta Trump-i ashiba den parnoki iba maongka agütsüba ya asadangdar, ta ashi.

Canada indang parliament-i UK indang King Charles III host asüba sülen ghonda ishika dang lir Trumpi iba olen ya lemsatepa liasü.

Chuba-i O jembiba sülen Canada Ato Kilonser Mark Carney-i, Canadian Public broadcaster CBC dang ashiba agi, July 1 nü tashi nungbo ReArm Europe nung Canada adentsü imla atar, koba prangbong injang aser hadir balala atema US dak metaloker aliba tajemba kümdaktsütsü atema lir.

Trump-i pa tebilemba lemsatepba dak sendakba nung Canada-i kecha telangzüba magütsü, saka Carney-i taoba mapang par linük aser US na defence system ken o atema

sensaksem ka akaba jangjatsüogo.

Trump-i ashiba agi, Golden Dome system ya USD billion 175 intoka yanglutsü aser pa indang term madem tsüngda 2029 küm tashi nungbo tembangtsü, ajisüaka defence industry expert temi mapang aser senotsü dak sendakba nung tetsükdaktsü adoktsü aliba indang ashishiogo.

Iba system atema "Big, Beautiful Bill" ajanga USD billion 25 bo angutsü Trump timla lir. Iba bill yagi military aser arrtsü nung inyakyim atema senotsü tali intoktsü temelaba agütsütsü.

Golden Dome ya Israel indang Iron Dome dak ajemdaker lir. Iron Dome ya anepalutsü atema UD-i kümshia USD million 500 agütsür.

US ajunga ayimjemtsüsa Trump-i Iron Dome ya koma amenoktsü aji mejangja, kechiyong Israel ya New Jersey den kasa dang lir, koba US nung state tilatiba rongnung ka lir.

Iron Dome ya short-range missiles tem khadangtsü atema lir, ajisüaka US atema amokmeren tongtibangtibajibo long-range ballistic aser hypersonic missile tem lir.

Trump-i anüng nung prangbong hadir balala toktsütsü sentong yangluba ya China, North Korea aser Russia nunger ajaki aitsüogo. Iba sentong ya Trump-i taoba hopta-ang mezüngbuba tatongi rasa shia liasü.

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING

NAGALAND: KOHIMA

NO.SCERT/DIET/ADVT-2/2024

Dated, Kohima the May 2025.

ADVERTISEMENT

Applications are hereby invited from indigenous inhabitants of Nagaland for the following posts under the establishment of DIETs, SCERT for the district of Tuensang and Kohima.

SI No	Name of post	Pay Matrix level	No.of post	District
1	MTS	Level- 1	1	Tuensang
2	Duftry	Level-2	1	Kohima

Terms & Conditions:

1. Educational Qualification:

Class 10 passed (along with all supporting documents i.e ST/ Indigenous/ Birth certificate/ Class 10 Admit card/ Aadhar card/ 2 Nos.of recent passport photos.

2. Age limit:

the candidates should not be less than 18 years or more than 35 years of age.

3.

The application should be addressed to the Director, SCERT, Nagaland.

4.

Last date of receipt of application shall be 13th June 2025

5.

Admit Card shall be issued on 24th June 2025

6.

Interview shall be conducted on 25th June 2025

7.

Submission of incomplete documents will be summarily rejected.

8.

Canvassing in any form will result in cancellation of the candidature.

9.

The post is exclusively for indigenous inhabitants of Tuensang and Kohima District respectively.

(KEVIRALEÜ KERHUO)

Director

SCERT, Nagaland, Kohima

Taoba Real Sociedad & Arsenal asayar Carlos asaya nungi anisüngzüker

Monupii/May 28, 2025

(Agencies): Taoba mapang Arsenal aser Real Sociedad forward Carlos Vela, küm 19 asayaba sülen football asaya nungi anisüngzükerba Mongolbarnü sangdongogo.

Vela ya Arsenal indang youth system nungi anitetba asayar ka saka work permit ken o adokba ajanga pa Salamanca, Osasuna, aser Real Sociedad amala Spanish club balala nung loan nung oa asaya liasü.

Pa Arsenal nungi Premier League nung asaya 29 nung asaya aser iba sülen LaLiga club Real Sociedad nungi küm tenet asaya liasü.

Real Sociedad nung Vela ya kanga nüngtugu aküm, kechiyong pa dak kanga sangra asayatsü aser goal idaktsütsü sempet tajung liasü.

Vela-i forward, attacking midfielder, mesüra winger ama ayong ayonga asayateta liasü. Pa Mexico tenüng nungia 72 ben asayaogo aser CONCACAF Gold Cup anaben tashi kokogo.

"Kü career tepeyong ni mapang tajung aika ajangshiogo, ajisüaka tang professional football asaya nungi officially anentsü mapang tongogo. Nenok ajak den kü career lemsateptsü ya maongka aser tetushi liasü," ta pai Instagram nung zülutsü.

2019 MLS season nung Vela-i goal 34 idakja league record tasen ka yanglu aser pa ya club nungi goal timtiba idaktsüba, assist timba sütsüba aser timbaben asayaba asayar lir.

Vela 2018 küm Major League Soccer (MLS) nung Los Angeles FC (LAFc)-i ao.

Club nung adenba sülen pa yakta dang kanga nüngtugu aküm aser league nung asayar tajungtiba rongnug ka küma club-i MLS Cup aser U.S. Open Cup akokba nung teyari agüja liasü.

2019 küm pai otsüsütsüsa regular season nung goal 34 idaktsü aser MLS MVP award ngua liasü. Pa lenisüba nung LAFc ya league nung team tashi tait ka küma liasü.

Vela Mexico den international career ya tajunga kanga tajung saka mepetmesü agia sünger liasü. Pa FIFA World Cups (2010 aser 2018) ana nung asaya. Ajisüaka pa national team den tesendaktep tebenja liasü aser jurila maparen atema international asaya nungi atsügingba den team achayangertem den mangatettep adoka aruogo.

Yamal-i Barcelona den küm 6 atema tenangzüktepba yanglushiogo



Monupii/May 28, 2025

(Agencies): Tang asaya aliba season nung Barcelona nungi kanga junga asaya-a club-i asayamung asem tashi akokba nung teyari agütsüba sülen Lamine Yamal-i club den ano küm trok atema tenangzüktepba yanglushiogo.

Arishi küm 17 tain Spain nung asayar aser club na tenangzüktepba ya 2025-26 season tatemi tembangtsü liasü, saka tang tenangzüktepba yanglushiiba sülen pa Barca nungi 2031 küm tashi asayatsü.

Yamal, shiba arishi küm 15 asüba mapang 2023 küm Barca nungi mezüngbuba asaya liasü, pai asaya 55 nung Barca atema goal 18 idaktsüba den assist 25 süja par team-i La Liga, Copa del Rey aser Spanish Super Cup akokba nung teyari tulu agüja liasü.

Barca-i ashiba agi, Yamal-i club tir Joan Laporta aser sporting director Deco na matsüngdang Mongolbarnü tenangzüktepba tasen ka yanglua liasü.

"Yamal-i tenangzüktepba yanglushiiba ajanga Barca

indang project akang akanga aliba sayur. Pa ama lanur asayar tajung aikabo mali," ta club-i ashi.

Yamal-i club nungi 115 ben asayaba mapang goal 25 idaktsür lir aser pa ya La Liga, Copa del Rey aser Spanish Super Cup puti otsü nung goal idaktsürtem rongnung tanobusang lir.

Yamal shiba July 18 nü arishi küm 18 ajungtsü, pa ya Barca atema asaya 100 nung asayaba asayar tanobusang lir.

Kasa mapang nung pa Spain team nungia 19 ben asayaogo aser Euro 2024 akokba team nung pa densema liasü. Berlin nung iba asayamung final nung Spain-i goal 2-1 agi England koka liasü.

Pa ya barca nungi nüngtugu asayar Lionel Messi den medemdanga aruda. Tenaprongla ya club indang La Masia academy nungi anitetba asayar lir.

Barca-isa, manager Flick aser Brazil nung forward Raphinha na dena hopta tsünga tenangzüktepba yanglushiogo.

French Open: Paolini tasembuba round-i iogo

Monupii/May 28, 2025

(Agencies): French Open tetsür kija asaya nung Bodhbarnü Jasmine Paolini-i maneni kanga junga asaya la tasembuba round-i iogo. Kasa mapang nung Iga Swiatek-a Roland Garros title pezübuba adonga abentsü atema merangdar.

Taoba küm runner-up asayar Paolini-i tanabuba round nung 6-3, 6-3 agi Ajla Tomljanovic koka iba ita tetenzüklen Italian Open akokba sülen tang tashi asaya ti nung khen danga tamakok mongui asaya arudar.

La tasembuba round nung Russia tsür Anastasia Potapova mesüra Ukraine tsür Yuliia Starodubtseva den asayatsü.

Kasa asayamung tetsür kija asaya nung Olympic champion Zheng Qinwen-i 6-2, 6-3 agi Colombia tsür Emiliana Arango koka round of 32 tongtetogo.

China tsürla ya taruba round nung arishi küm 18 tain Canada tsür Victoria Mboko den asayatsü.

Küm 102 tejakdang Suzanne Lenglen sülen Poland tsür Swiatek ya French Open pezü atonga akokba mezüngbuba asayar akümtsü meranga asayadar.

Taoba küm Coupe Suzanne Lenglen akokba sülen Swiatek tang tashi nung WTA final ka danga tonga asaya mali, saka lai iba asayamung kanga junga tenzüka Rebecca Sramkova straight-sets nung kokogo .La taruba asaya Britain tsür Emma Raducanu den asayatsü. Raducanu den asayaba mapang Swiatek khen danga tamakok ngua mali.

Kasa mapang nung Raducanu, 2022 küm sülen tang mezüngbuba iba asayamung nung asayadar. Lai ashiba agi la mezüngbuba round Wang Xinyu den asayaba mapang

shiranga laisü. January ita Australian Open nung round of 32 asayaba mapang la Swiatek-i 6-1, 6-0 agi koka liasü.

Swiatek WTA rankings nung tekübokba jenjangi aluba sülen la world number one Sabalenka, Paolini, aser Zheng nung den külemi ata lir.

Maneni Sabalenka-a iba asayamung kanga junga asaya tenzüko, aser lai mezüngbuba round nung game ka dang mekoki Russia tsür Kamilla Rakhimova ayong ayonga kokogo. La tanabuba round nung Switzerland tsür Jil Teichmann den asayatsü. Belarus tsürla yagi French Open final khen danga tonga mali.

Kasa asayamung tebur kija asaya nung Lorenzo Musetti shibai taoba küm semifinal tonga asayaogo pai 6-4, 6-0, 6-4 agi Colombia nung lucky loser Daniel Elahi Galan koka tasembuba round tongtetogo.

Singapore Open: Satwik-Chirag na tanabuba round-i iogo

Monupii/My 28, 2025

(Agencies): India nung rongnungi tebur tarep asayartem rongnung temaba jenjang nung aliba tarep, Satwiksairaj Rankireddy aser Chirag Shetty nati Bodhbarnü Singapore Open Super 750 badminton tournament nung mezüngbuba round asaya kokogo. Ajisüaka tia maka Lakshya Sen bo mezüngbuba round asayaba mapang yiruba ajanga masayatetsüsa aküm.

Chirag teberem yiruba ajanga March ita All England Open nungi atsügingba sülen tang mezüngbuba asayaba mapang taoba mapang world No. 1 tarep yagi Malaysia nung tarep Choong Hon Jian aser Muhammad Haikal na 21-16, 21-13 agi minute 40 nung dang koka liasü.

Iba asaya akokba sülen Satwik aser Chirag nati jenjang

41buba nung aliba Malaysia nung tarep ya tang agi tanabenbuba kokogo. India nung tarep ya tang alima nung jenjang 27buba nung lir.

Tena ya iba ita tetenzüklen Sudirman Cup nunga masayatei liasü, kechiyong Satwik temang mejungi liasü. Iba masüadang tena taküm Malaysia Open aser India Open naprongla nung semifinal tonga asayaogo.

Kasa mapang nung India nung rongnungi kija asayartem rongnung No.1 asayar Lakshya Sen mezüngbuba round nung Chinese Taipei nung asayar Lin Chun-Yi den asayaba mapang yiruba ajanga masayatetsüsa aküm.

Sen shiba tang jenjang 17buba nung lir pai asaya kanga junga tenzüker aser mezüngbuba game 21-15 agi akok. Lin shiba jenjang 19buba nung lir pai

tanabuba game 21-17 agi koka liasü. Decider nung Sen-i asaya 5-13 agi mekoki aliba mapang pa yiruba ajanga masayatetsüsa aküm. Sen koma yiru aji tang tashi mejangja.

Tarep temeyoktep asaya nung Rohan Kapoor aser Ruthvika Shivani Gadde nati America nung tarep Chen Zhi Yi aser Francesca Corbett na 21-16, 21-19 agi koka pre-quarters-i iogo.

Tetsür kija asaya nung Aakarshi Kashyap-i kanga meranga asaya saka pa China tsür world No. 4 Han Yue-i 21-17, 13-21, 7-21 agi koka liasü. Tena tsünga minute 58 asaya liasü.

Kashyap shiba tang world rankings nung 46buba nung lir lai mezüngbuba game bo 21-17 agi akok. Ajisüaka third-seeded Han-i tanungba asaya ana yabo amokbanger asaya-a 21-13, 21-7 agi koka liasü.

BENDANGLI OSANG : Tapak 7 nungi...

Trump aser Putin den külemi ajuruteptsü...

Ajisüaka sorkari kodang item tenokdangba agienar ajibo pai mashi. Ukraine nem mok-nü agütsüba nung range limits agientsüba ya lendong tulu asütsü, ta Kremlin-i ashir.

"Item telemtetba ya shidakba agia alinungbo, asenoki political (peace) settlement asoshi jangra aliba den khenyongi mapet asütsü... Item telemtetba nung lendong lir, parnoki agir alinungbo," ta Kremlin odongtar Dmitry Peskov-i osangbener dang ashi.

Kasa mapang kilometre 1,000 shi front line nung

maneni rarar aser linük anaprongi arütsü alema oa makteper. Ukraine den rara tenzüker Russia-i drone amshia tesashitiba Deobarnü maka liasü.

Mongulbar aonung aser Bodhbar anepdang Russian air defences ajanga Russian regions 13 nung Ukraine indang drones 296 khazüka yok, ta Russia indang Defence Ministry ajanga ashir.

Moscow leni aruba drones 33 tashi air defences ajanga khazüka yok, ta Russia linük yimtiba indang mayor Sergei Sobyenin-ia ashi.

BIEMDANGANG

"Tangari na sentoka metoktsütettsüsa tajung dang inyakang."